

Lebih 2,000 anggota PDRM Pahang siap sedia hadapi banjir musim MTL

- Oleh NORHAFIZAN ZULKIFLI
- 9 Oktober 2024, 2:22 pm



YAHAYA Othman (empat dari kanan) ketika melancarkan Projek Wakaf Van Jenazah PDRM Pahang di IPK di Kuantan, Pahang. - UTUSAN/NORHAFIZAN ZULKIFLI

KUANTAN: Lebih 2,000 anggota Polis Diraja Malaysia (PDRM) Pahang bersiap sedia bagi menghadapi banjir ketika musim Monsun Timur Laut (MTL) yang diramal berlaku lebih awal iaitu pada minggu keempat bulan ini, berbanding November nanti.

Ketua Polis Pahang, Datuk Yahaya Othman berkata, kesemua anggota yang akan dikhususkan untuk membantu penugasan ketika banjir itu sedang giat mengikuti latihan yang dijalankan.

“Selain itu juga kita juga sudah bersiap sedia memastikan aset-aset polis yang ada untuk membantu mangsa banjir ini dalam keadaan bersiap sedia.

“Polis sebagai pengerusi jawatankuasa pemindahan banjir juga akan berkolaborasi dengan agensi penyelamat lain bagi memastikan usaha menyelamatkan mangsa banjir berjalan dengan baik, teratur dan lancar,” katanya kepada pemberita selepas Majlis Pelancaran Projek Wakaf Van Jenazah PDRM Pahang di Ibu Pejabat Polis Kontinjen (IPK) Pahang di sini hari ini.

Kata Yahaya lagi, kesiapsiagaan bagi menghadapi musim banjir itu tidak hanya meliputi daerah atau kawasan yang berhampiran dengan Sungai Pahang sahaja sebagaimana kebiasaannya.

“Pada kali ini selain daripada biasa iaitu hanya meliputi kawasan daerah-daerah yang mempunyai sungai Pahang tapi juga meliputi daerah lain seperti Bentong yang pernah berlaku banjir Telemong dan sebagainya.

“Saya minta seluruh anggota bersiap sedia walaupun bukan sepanjang sungai Pahang juga perlu bersiap sedia,” ujarinya.

Dalam pada itu, PDRM dengan kerjasama Wakaf Pahang menubuhkan tabung sumbangan bagi pembelian van jenazah dengan menyasarkan sumbangan RM150,000 dalam tempoh tiga bulan.

Yahaya berkata, van jenazah terbabit sebagai tambahan kepada kenderaan sedia ada sebelum ini yang akan ditempatkan bagi kegunaan anggota di Pahang Barat.

“Tujuan kita bekerjasama dengan Wakaf Pahang ini bagi memberi peluang kepada warga PDRM Pahang untuk wakafkan sebahagian pendapatan mereka bermula serendah RM5 untuk van jenazah terbabit,” katanya. – UTUSAN